

鄢陵文獻志卷六

鄢陵蘇源生菊邨纂

土地志三

河渠

雙泊河

酈道元水經注洧水又東逕鄢陵縣故城南

戴震按酈近刻

訛作隱

洧水又東鄢陵陂水注之水出鄢陵南陂東西

南流注於洧水也 元和郡縣志洧水西北流入經

縣西十里 太平寰宇記洧水在縣西二十二里從

許昌縣界東南流散漫 宋楊侃皇畿賦潺潺洧溝

文獻志

卷六

一

渙渙洧水入鄢陵而碧截原田過扶亭而清映閭里

金史地理志鄢陵有洧水 明史地理志鄢陵北

有洧水 范守已御龍子豫談溱洧二水合流而東

居人謂之雙泊河 施志雙泊河卽洧水下流自溱

洧二水並流經新鄭縣城南又東受黃水又東受南

濮北濮二水又東南受龍淵水又東南受稟水逕長

葛縣城至東南郭折而北流入洧川界復東受清泉

水又東南逕洧川城南受大沼水又東南逕新汲故

城北東南入鄢陵界又東北入扶溝界東注於沙河

劉訥曰溱水卽澮水水經注云澮水出鄆城西北

雞絡塢下南注於洧詩所謂溱與洧者也洧水出潁川陽城山山蓋馬嶺之總目東過新鄭南澗水注之東南與龍淵水合又東逕長葛及鄆陵故城南謂之雙洎今縣北二十里爲舊雙洎河成化以前逕彭祖店東入小黃河宏治九年山水泛漲決洧川栗家口河始淤塞水趨南與七里河漫爲一陂東西接扶洧二縣界渰田不下萬頃知縣王時中嘗謂築口不如濬河正德四年知縣孫讚再築之患如故嘉靖二年知縣尹尙賢議行濬道法會先城事未及爲調去嘉靖九年知縣馮霄力主前議先塞決口以遏橫流次

開支河以分水勢第因河窄隄薄未幾潰決汪家坡距縣僅三里於是城郭田廬冢墓咸可憂矣嘉靖十四年知縣史文彬亟往督築誓神程工是歲田始稼方議堅築汪家坡口而以憂去明年水大至隄盡決仍出古城南流患較前尤甚用是知縣曾添錦令民韓章奏行再修竊惟此水來自西北勢如建瓴北日高南日下工不就緒其說有三洧人爲城計遇大水則壞防泄下以自保是閉口之無益一也鄆人爲利計遇興工則謀管延遲而苟完是修河之有害二也扶人則久占河身爲已田欲舍上流而別濬豈惟扶

人鄢人之黠者尤甚此皆私便自圖害功之大者也  
爲今之計惟從決口順察水勢南北夾築護隄至汪  
家坡以下原河分定丈尺翻隄挑展務令堅實庶河  
濶足以受水隄厚不至於潰流矣爲民軫茲慮者尙  
鑒之哉 陳州府志嘉靖初鄢扶之民詣闕陳請奉  
部劄疏河 明杜孟乾雙泊河碑明興雙泊由孟亭  
透迤而南東入於小黃河鮮及汜濫正德壬申地道  
弗貞於下水自洧川栗家口決而孟亭之故道湮淤  
於是南席之水旣瀦滙於鄢復溢於扶越十五年嘉  
靖丁亥鄢扶之父老相率詣闕門陳狀而扶父老又

相率詣撫院陳之爰就坡之最窪者導之入扶由老  
鸛嘴稍北經東晉岡轉折南下東逾古地達於史家  
湖訖於庚戌底定民乃粒食 蒙按杜孟乾此碑爲  
扶溝言也而云就坡之最窪者導之入扶是導鄢之  
水入扶而弗如壅遏也先民大公之見若此後人爭  
執興訟勿乃未體先民之志乎 經志文水河爲雙  
洎支河知縣高有聞創開 梁之鯤曰鄢之受害由  
於洧水橫溢其所以橫溢者由於無河之可歸也扶  
人築隄自防以鄢爲壑上下交壅欲塞無策欲疏無  
地徒費畚鍤以滋訟擾於是高侯親行原野審察形

勢創開支河上流有水悉歸支河以分其勢正與前  
侯王時中初見相合至是水由地中行鄆民三十年  
來無漂沒之害而享耕鑿之利高侯之功真不在禹  
下矣 施志文水河在雙泊故道南七里河北自莊  
頭西入鄆境由古城西門入逕彭祖店南東游晉家  
橋毛家橋彪岡半截岡通丁家橋入扶界上自尉氏  
界下至扶溝界東西共四十九里 施志按邑北舊  
有雙泊河自洧川入鄆鄆受洧下流夏秋霖雨旬日  
則客水驟集水勢湍悍土壤輕脆易潰多成巨浸漂  
沒室廬而扶溝不受鄆之下流捍以橫隄鄆因數被

水患萬厯間邑令高有聞躬行詳視歎曰古有決河  
浚川而無隄防壅塞禹疏九河所以分其勢也是當  
別開支河以洩之乃於舊河之南另闢一河民心踊  
躍不日告成水勢既分遂無嚙決之患自河開後已  
未發南宮者五人因名文水河 梁克從記密之溱  
洧合流以東曰雙泊既自洧川入鄆經鄆彭祖店又  
東趨扶溝達宋故漕所謂小黃河者此經流也嘉靖  
中徙而南距縣七里名七里河今淤復歸彭祖店故  
道而洧有客水汎溢秋夏穿鄆古城別由彭祖南折  
東下始襄民田嚙焉扶捍以橫隄於是馬房彪岡浸

滙綿互卽廬井圯沒毒我婦子扶望洋西笑而自慶  
其計踵白圭不流禍千禩乎先是都門曹公治兵陽  
翟頗謂水利利民稔聞鄆患前令涇陽王公請濬雙  
洎稍收客水曹爲亟聞兩臺扶閔激云事干四縣役  
動萬人遂寢無何高公下車首詢邇者議濬云何父  
老進曰洧支弗塞扶隄弗開濬故何爲祇益鄆沼視  
事之日走謁陽翟以告而兵使者亦愀語將無諄樹  
一勁敵乎蓋鄆一敵扶而數十年不勝也再敵洧而  
洧明撓之扶陰搆之又數十年不勝也直俟河之清  
耳公慨然曰吾不恡擲一令獨不甘令與鄆兩敗且

夫洧有漫流不能東幸以鄆當倘洧西受溢如鄆洧  
無策矣扶有通流不肯疏幸以隄當倘鄆不修睦如  
扶扶奚恃乎昔禹治洪水四瀆惟河最悍而當逆河  
之人不難釀一爲九夫一而九今所駭動爲大也鄆  
水無恃九河荒度亦不仇哉胡徇築舍則洧而扶復  
扶而洧胼胝泥淖周爰旬時還坐邑朝廣詢便計衆  
猶紛執挑濬公曰無以爲也七里旣墊水必不上洧  
川有界工必難前且濱漾奔潰匪由其舊濬必無益  
是當互開支河承漢店南使漫漶就軌盡歸雙洎而  
扶反自笑其隄如終慮隄梗試鑿小渠於隆西之隸

鄆者引入七里下流用觀勢而決策焉渠已水減十  
三卽藝宿麥千畝民乃忻舞從事支河無何支河竣  
是役也因其下不與地爭因其流不與河爭因其境  
不與鄰爭然鄰爭縱不勝勝理在也地爭河爭先自  
困踣河澍而河勢愈橫鄰焰愈張此羸者鄆甯冀息  
肩乃粒哉及布武賦工給值資地絲棼縷析衆著子  
來始事戊午孟春望後一日迨告成實浹旬加三穀  
之費爲百者九六出義倉三橐中轉石橋彭祖通達  
一伐木略約沿河津渡十餘又建倉積粟綢繆永久  
所需多金悉以捐擗倡助錙銖不煩官帑而聲色不

大興除晏然仁人之利溥矣鄆爲歌曰新河兮湯湯  
導他水兮於我疆我稼我穡兮世食其康又歌曰截  
長隄兮如虹圮我族兮奏爾功我有庚辰兮殺怒濤  
以來爾胡不訟諸河伯之宮明年己未雋南宮者五  
人明制科以來未有也形家謂七里河距邑近而北  
注之南再北始東破軍星也新河亦始西北然紆曲  
漸歸東南有情之水迴抱廿餘里於人文最利公爰  
錫嘉名河暨橋俱稱文水云公名有聞山東益都人  
萬曆丙辰進士主簿馬一駿典史李榮春咸與河績  
例得并書 一統志雙泊河自許州府長葛縣流入

洧川縣南又東南流逕尉氏縣南鄢陵縣北東入陳州府扶溝縣界卽古洧水舊自許州流逕鄢陵縣南水經注洧水自許昌汶倉城東逕鄢陵縣故城南合鄢陵陂水又東至桐邱元和志洧水西北流入經鄢陵縣西十里是也其在洧川南者本洧水支流康溝水水經注康溝水首受洧水於長社縣東南流逕向岡西後人遏其上口今水盛則北注水耗則輟流是也自宋人通惠民河引洧水自許田注鄢陵歷扶溝合蔡水始經洧川城南鄢陵縣北明時謂之雙泊河舊志今水自長葛東北迤邐逕大隧山南延秀岡側

至洧川故縣西南屈而東南行經許田店北入鄢陵縣界經縣北二十里明宏治九年山水泛漲決洧川栗家口故道漸淤水勢趨南橫潰旁溢嘉靖十年水決汪家坡去鄢陵縣僅三里隆慶三年改鑿新河水患稍息萬曆四十六年創開支河自鄢陵西莊頭由舊城西門經彭祖店南歷晉家橋彪岡至丁家橋而上上流之水悉歸支河 讀史方輿紀要洧水在縣北二十里自洧川縣流入境又東南入扶溝縣界施志雙泊隄在縣北自尉氏界起至扶溝界止長四十五里 經志隄在縣北互中牟洧川鄢陵築以防

水名雙洎隄一名長隄水經注云洎水自鄆陵東逕桐邱南俗謂之天井陵洎水又東南經桐邱城西南去許昌故城三十五里俗名之曰隄其城南卽長隄固洎水之北防也 尉氏志明尉氏知縣齊勉慮雙洎河爲患集洎川鄆陵二縣民夫築隄六十餘里防之 明劉訥詩百里鄆墟二水橫憑高北望浦雲平蔚藍直見天同色野雪何妨棹獨行修楔自矜春服麗濯纓甯謝漢江清卻防山雨添秋漲隴畔時聞太息聲 明陳棐詩渺渺錦紋行虹垂綠漲平波光堤影動沙出浪痕輕共願爲霖沛同期到海清孤舟橫

渡處幾欲濯塵纓

國朝沈荃洎河月夜詩雙洎

澄波靜秋清月更明乘槎應有客不待海湖生

七里河

施志七里河距縣七里故名上自洎川栗家口入鄆境西小岡東逕謝家坊古城前南由徐家坡七里橋馬貢莊胡家莊至鄭中丞塋前北入丁家橋河自水歸故道遂涸嘉靖八年知縣馮霄挑濬以祛水患康熙四十五年知縣李而侗復濬 劉訥記皇帝御統之八年詔簡賢雋充守令維時黃陂鄉進士馮子霄方試禮部乃承綸命來令鄆甫下車召諸父老謂曰

匪城曷衛匪田曷租安養斯民茲其大者遂登陴視而嘖嘖曰墉壑高深隄護萬柳東萊尹賓卿之功於是爲峻續而終之詎曰難哉旣而北望雙泊千頃漭漭復喟然嘆曰無田奚食無食奚稅有司之責庸得而逭諸父老曰水高西北近洧城夏秋泛漲非水潰隄則洧人懼害己而私決之下趨東南灌鄆墟者數矣馮侯曰盍障諸躬自度勢移檄起夫役逾月河口塞水復由故道是年禾麥有秋行者不病涉咸手額曰我侯之惠奚啻免於墊溺侯聞之曰有是哉再召父老于庭曰水障易決水分易泄吾欲沿七里河故

道度其污下別濬一渠以殺水勢保無後虞如何衆曰此我邑侯海山王公夙志也刻期疏濬輟于被徵詎意三十年來同符若是耶咸稽首謝侯乃請于巡撫永康徐公暨巡按司府諸君咸躋之謁吉臨河親畫形勢披檢戶籍審編里夫遴委官屬敏幹者督之仍時率濬巡閱懲獎有方人心競勸工將就緒民不告勞兩厓夾水蜿蜒如岡無何秋水至隄再決瀕河禾稼不遭沒惟近古城若干里未開處猶罹前患會有弗率輩訟侯于監司監司廉知其枉置訟者於法侯還益修職業時值隆冬工暫止今年春督夫先捍

河口已乃挑通河流舟楫可達江淮暎帶北郊增盛  
吾土由是耕者樂於野行者喜於途士若夫胥慶於  
家乃謀勒石爲侯頌功謬徵余言按酈道元水經注  
云洧水東逕鄆陵故城南又云鄆陵南陂流注於洧  
水今古城卽鄆故城彭祖店河卽此水其謂陂水流  
注者疑卽七里河西北窪滙處豈古人治河濬此亦  
爲殺水勢耶王公欲爲而未成馮侯一舉而兼得築  
堰易然隨閉而復開挑河難然一勞而永逸大抵因  
民之所利而利之夫孰曰難以佚道使民夫孰曰勞  
蘇長公嘗曰治河之要宜推其理而酌之以人情又

云隄防省而水患衰侯蓋得諸此焉侯宿學通才政  
教兼舉需時考績行將陟明治河特其大者耳禦災  
捍患邑人且將尸祝之獨文足徵己乎據圖上自洧  
川南河至文家岡河共十三里下自扶溝至洧川河  
界共四十九里闊凡八丈功成侯又下令沿河樹柳  
以防岸之善崩隨地濬湮以利水之蓄泄可謂保終  
慮遠者矣後之人尙亦謹視以毋隳厥功哉贊治主  
簿臨汾侯聰典史平涼翟佩玉督工陰陽官魏僕鄭  
強義官欽詔俱邑人咸得列名乃作頌曰芍陂楚利  
漳渠鄴傳於維洧水患迫吾鄆馮侯泣邑憂則是先

乃墮修堰乃別濬川道洧宗海罷漁復田民罔賦急  
行不裳褰風高岸峻仰侯令堅波恬月皎比侯譽賢  
海山司馬志不隳前東萊尹士誠且賴延河流浩浩  
保障巖巖此城此水於萬斯年 劉連築隄議曰古  
溱洧流經我鄆之北境俗稱雙泊河河舊在彭祖店  
土堅隄厚人利其通商舟資貨殖恆恐其汜濫無肯  
盜決者未聞爲害後惑於堪輿家說開支河分水勢  
距城不及七里此蓋有禍胎矣然民風尙淳土不必  
堅隄不必厚未知盜決斯亦未爲害也邇者黠農利  
其灌稻奸徒利其淤地篙工利其賣渡盜決興而故  
道淫焉河始爲害嘉靖甲子秋連上書少司徒遲公  
曰復彭祖店河故道便復七里河故道不便遲公卽  
付之憲使梁公委勘問盜決之家喧騰淆亂連作治  
河議上梁公公悟方移檄疏濬會張侯下車盜決之  
家又哀告侯曰從民便遂復七里河故道時士類託  
連作翕河頌拳拳慮盜決者侯笑連過計甫踰年河  
仍汜濫侯嘆曰悔不用劉生策噬臍無及矣侯去河  
害滋甚今年夏水侵城隅而北郭蕩無棟宇東西二  
郭危加春冰之陷

文河

文獻志

卷六

十一

王芸心曰河在縣西北五里許係民間洩水渠康熙二十五年邑令黎可逢開上自洧川境夾岡潭起東逕油漢寺抵本境黃邨店温家潭窑子陂至北關名文河先年猶未大害後因上鄰諸陂盡開受水愈多加以洧境古家橋洎河決口溢水合流河不能容遂至泛濫邑西北黃邨店以下等莊田禾廬舍盡爲澤國至城北漫衍四出爲害益甚留心水利者尙思有以導之也 續河南通志洧川油漢河入鄆陵縣文水河 施志文河在縣西北下達小北關河在本境計長十八里 蒙按小北關河入於城河城河之水

文獻志

卷六

十一

由絡江下達扶溝之大浪溝

非鄆南之大浪溝

西華之史家

湖扶溝志云大浪溝上通鄆陵小北關是也又云鄆陵小北關有岡一道岡北汪家陂一帶之水不得驟洩於岡南者全賴此岡爲捍禦鄆人某貪岡北膏腴之田誘扶民鑿此岡俾鄆陵東南一帶居民竝扶溝西南數地方之土田廬舍盡委洪波且下達西華史家湖而史家湖數千頃良田竟成瀦水之區扶溝生員翟鶴鳴鄆陵生員周復旦控告三年蒙開封府孫河道王勘詳撫部院堵塞結案雍正八年鄆人某又復開鑿扶邑左如松等爭之不得直而此關竟開迄

今三十年來愈衝愈深愈開愈大昔爲巍然之陵阜  
今成淵然之澗谷扶志此言蓋爲下流受害而言然  
古之善爲川者決之使導昔人開小北關河所以救  
上流之害也居下流者雖有小害惟宜隨時疏濬使  
水暢行復爲溝洫以分洩之築陂塘以儲蓄之不與  
水爭利自不受水之害今不知務此而惟追咎開河  
之人過矣

### 三道河

施志三道河在縣西南二十里係民間洩水渠北道  
上自本境黃龍邨陂起至本境閻段邨入清流行河止

### 文獻志

### 卷六

十三

計長五十餘里中道上自本境所邨西許州交界起  
下至本境屯溝西入清流行河計長六十里南道上自  
本境明義邨西許州交界起下至本境五空橋入清  
流行河計長六十餘里 施志按三道河自許州東秋  
湖流入境內河本三汊中夾支流竝列三渠渠各有  
橋又東南合清流行河順治十三年知縣經起鵬鳩工  
築隄旋衝決

### 清流行

水經注潁水又西南流逕陶城西又東南逕陶陂東  
太平寰宇記潁水在鄆陵縣西南四十里從臨潁

界入東南出扶溝縣界 金史地理志鄆陵有潁水  
一統志潁水在鄆陵縣南自許州府石梁縣東南  
流入又南入許州府臨潁縣界縣志今有清流入在  
縣南五十里卽潁水之別名 段玉裁說文解字水  
經曰潁水出河南密縣大騶山東南入於潁今潁水  
自新鄭大騶山南流經許州長葛縣流入許州北二  
里又南經許州臨潁縣而合於潁一名魯固河又名  
清流入是也 經志清流入在縣南五十里水經注  
云潁水又東南潁水入焉是已今入沙河者卽此水  
然在本境惟隨水大小以爲盈涸非通津也 施志

文獻志

卷六

十四

清流入在縣南四十里上接許州東秋湖流經鄆陵  
至西華界入潁河河在本境自錢家橋北起東逕順  
羊野岡劉家橋曹家橋橫石橋至周家橋東入西華  
界計長六十里 饜剛克曰清流入源本大騶山而  
今專言秋河者以上所接故也至舊志云合於石梁  
之艾城河艾城係潁水下流卽今潁河之上源也現  
爲通津又據許州志秋湖潁水經其中潁水又名清  
流河鄆境想亦潁之故道耳

流潁河

山海經潁水出少室少室山在雍氏南入淮西鄆北

郭璞注云今潁水出河南陽城縣乾山東南經潁川  
汝陰至淮南下蔡入淮鄢今鄢陵縣屬潁川 一統  
志潁河在鄢陵縣南六十里自許州府臨潁縣流經  
縣界又東南入陳州府西華縣境 經志潁河舊志  
云在縣南六十里上流亦潁水自許州八里莊東逕  
麻糲橋水經云三河奇發不知果何源也 施志按  
潁河源三一出登封縣古陽城乾山一出少室山一  
出少室南溪東流受雙溪河水水出嵩山又受五渡  
溪水水出嵩山東谷又東入禹州西境受谷河水水  
出玲瓏山又東逕禹州北境受湧泉水水亦出玲瓏  
山受黑水河水水出張翁澗又東受中義河水水出  
大陵山又東入許州界經襄縣西北一名渚河又東  
過臨潁至鄢陵西華分界受潁水潁水源出新鄭大  
騁山一名魯固河又名清流河東逕長葛許州又名  
艾城河因魏鄧艾引潁水屯田得名又東至鄢陵臨  
潁分界受石梁河水石梁水出密縣山谷中東逕超  
化寺前滙爲黑白二龍潭又東逕石固寨南有石橋  
爲許州長葛分界流入臨潁東北境鄢陵界合潁水  
潁石二河合流流至鄢陵西華分界歸潁河今名流  
潁河者以潁水別名清流清流潁水合流故也又東

逕陳州南沈邱北抵歸德府鹿邑縣南而合於蔡河  
蔡卽賈魯河又名惠民河 施志流潁河去縣八十  
里上接艾城石梁二河入鄆潁二縣界南由張林橋  
轉東入鄆西二縣分界過麻糝橋東合潁水河卽渚逕  
倉頭邨祁家堂東入西華境自河上邨至祁家堂計  
長四十餘里 施志又按潁河上源受水之多與洎  
水等察本境洎潁二河寬不過六七丈焉能容上流  
無限之水是以一經暴雨縣南扶濟新色陶城橫里  
一帶皆成澤國縣北官莊七級彪岡楊河地方未有  
甯宇堵固不可疏又不能此眞守土者之隱憂也

西華志流潁河卽潁水之分支至祁家堂入渚水曰  
合河口南岸屬西邑向無隄埝北岸屬鄆邑有青龍  
隄一道西邑藉以捍禦向時鄆西兩邑彼此推諉幫  
修屢經成訟至雍正二年藩憲批定青龍迤西責令  
鄆民幫修青龍口迤東責令西民承辦邑人張友正  
云潁之上流卽潩水自許州八里莊逕鄆陵入境逕  
張八莊會雞爪溝又經麻糝橋東流入合河口 施  
志流潁河隄自張林橋起至祈家堂止長二千一百  
九十丈南岸界西華北岸界鄆陵時值汜濫兩岸齊  
決滄民田不下千頃乾隆十三年知縣張澗將北岸

築隄一道寬三丈高一丈二尺連年水發鄆不爲害  
吳志按此隄之築不特鄆民受其利也卽西華亦  
受其利焉蓋隄雖係鄆境又北一里卽入西境每遇  
水發鄆境之被滄者十之三西境之被滄者十之七  
而無如西民刁悍藉口隄屬鄆境隄潰自當鄆人獨  
修鄆民則以爲西華之害比鄆尤甚且隄南亦係西  
境居隄南者利於隄潰倘西民不修則隄南之人日  
耽耽於此隄鄆民防之而不勝防矣故潁河水決則  
彼此構訟不休雖屢經斷結亦隨時翻異皆緣長民  
者不知大體各私其民否則素性異懦威不克制耳

若將此地并入一邑則無牽制之病矣 吳志歷年  
勘修案卷康熙二十四年流潁河決口數處至二十  
八年奉委開封府劉通判勘驗飭令鄆民獨修四處  
西民分修黑里邨隄工六丈四尺 三十年青龍隄  
立碑內載青龍口以西隄工鄆陵獨修以東鄆陵修  
六分西華修四分 四十八年決口二十處奉委開  
封府李經歷勘估土方一萬均作四六分修鄆陵修  
六分西華修四分 五十一年決口十處鄆陵西華  
會勘仍照五十年工程鄆六西四分修 雍正四年  
決口九處奉委太康項城二縣勘詳青龍口以西六

處計七十丈九尺鄆陵承修以東三處計三十八丈  
西華承修 乾隆二十六年決口至三十一年奉委  
中牟商水勘詳議以青龍口以東鄆陵加修二百二  
十丈鄆民未經遵辦 三十六年決口至四十九年  
奉委試用知縣楊榮宗會勘西華縣獨詳河道批令  
鄆陵獨修未經遵辦 嘉慶十一年四月初三日青  
龍隄迤東四百八十五丈決口四十丈奉委候補同  
知張勘詳議令鄆四西六分工修築

### 十字河

施志十字河在縣西南形如十字元設閘以則水西

### 文獻志

#### 卷六

十八

營等處有遺址今堙

### 玉帶河

施志玉帶河以兩渠環抱似帶圍也在城西南三十  
五里北渠起自許境清陽坡下入鄆界逕賢莊至常  
家寨東合南渠南渠起許境楊家寺坡下入鄆界逕  
許由寺羅寨至常家寨東合北渠二渠合注東由荆  
王家歸三道河

### 絡江

經志絡江派自許州逕本縣栢梁寺南迤邐城西南  
隅過孝子岡入西華境史家湖漫入沙河相傳爲汨

羅非蓋古泄水之渠其形聯絡故謂之絡江近年城南水患議者欲疏此惜哉因循無倡之者

### 蔡河故道

宋史河渠志蔡河貫京師爲都人所仰兼閔水洧水潁水以通舟閔水自尉氏歷祥符開封合於蔡是爲惠民河洧水自許田注鄆陵東南歷扶溝合於蔡潁水出鄭之大騶山注臨潁歷鄆陵扶溝合於蔡凡許鄭諸水令堅白雁丈八溝京索令西河褚河湖河雙河欒霸河皆會焉猶以其淺涸故植木橫棧棧爲水之節啟閉以時乾德三年二月令陳承昭率丁夫數

### 文獻志

### 卷六

十九

千鑿渠自長社引潁水至京師合閔水潁水本出密縣大騶山歷許田會春夏霖雨則泛溢民田至是渠成無水患閔河益通漕焉 施志今許田店北有遺迹一支經縣西栢梁橋迤邐東南杜郎邨馬欄鎮河岡等處入西華境一支經縣西乾明寺前城東北隅入扶溝曰河漕是爲古蔡河又按水經注沙音蔡說文正作沙音言水散石也從水從少水少沙見然則今之所謂沙豈古之所謂蔡耶 梁熙哲次齋集宋以馬欄爲重鎮聚漕運今邨中官道卽漕河

### 南陂

水經注洧水又東鄆陵陂水注之水出鄆陵南陂東西南流注於洧水也

### 蔡澤陂

水經注長明溝與鄆陵陂水雙導亦謂之雙溝又東南入沙水沙水南與蔡澤陂水合水出鄆陵城西北春秋成公十六年晉楚相遇於鄆陵呂錡射中共王目王召養由基使射殺之亦子反醉酒自斃處也陂東西五里南北十里陂水東逕匡城北城在新汲縣之東北卽扶溝之匡亭也 水經注長明溝東轉北屈又東逕向城北城側有向岡又東右迤爲染澤澤字

### 文獻志

### 卷六

二十

趙一清本作工字

陂而東注於蔡澤陂 魏書地形志鄆陵

有蔡澤陂 劉勰曰按尉氏西南栢岡保有蔡陂城與鄆古城相近 經志蔡陂通志云隋開皇十六年分長葛許昌鄆陵三縣置蔡陂大業二年廢者卽此 蒙按一統志云蔡澤陂在尉氏縣西南方輿紀要云在尉氏縣西南四十五里蓋隋時割三縣之地立蔡陂縣及縣廢則歸入尉氏矣以其地舊屬鄆陵故仍載之

### 陶陂

水經注潁水又西南流逕陶城西又東南逕陶陂東

深陂

魏書地形志鄆陵有深陂 蒙按深陂今無攷

三門陂

魏書地形志鄆陵有三門陂 蒙按三門陂今無攷

臺子陂

施志臺子陂在彭祖店北

殷家陂

施志殷家陂在阮寨東

栗園陂

施志栗園陂在殷家陂東

文獻志

卷六

二十一

紅溝陂

施志紅溝陂在七級北

關蹬陂

施志關蹬陂在紅溝陂北 韓程愈曰雙洎以北陂田之水會歸有二西有臺子陂東有關蹬陂其餘小陂凡十數皆二陂之附庸也關蹬陂受太溝河水無出水路當尉陂泛漲之時則溢而至於太溝河以達於白家潭大河此惠民河之一上流也至扶溝北關而東入矣臺子陂之水亦無可去止有小支河深不滿三尺寬不能逾丈陂水既盈則由此而瀉於殷家

陂栗園陂紅溝陂三陂之水至此而止舊有鴨子口以下瀉於扶溝自某出而強塞鴨子口築秦家堰不許東行而二縣之河訟起矣 蒙按鄆陵之水無去路由於扶人之壅遏而扶溝志乃云秦家岡在扶溝西北四十五里與鄆爲鄰岡西三陂相聯鄆扶雜處其中上接三十六陂中有小岡爲障萬曆七年鄆陵陳尹欲建奇功將小岡鑿斷引三十六陂之水總匯於三陂又云鄆人鑿盤龍河三道引水於此岡之南漫衍而東鄆陵不過欲水有去路耳爲扶溝者誠能大公爲懷因鄆人之所疏濬者而疏濬之以達於下矣

文獻志

卷六

二十一

楊河陂

施志楊河陂在丁家橋南

窑子陂

施志窑子陂在張坊莊前

汪家陂

施志汪家陂在黨家岡東

屯溝陂

施志屯溝陂在沙灘南

海紅溝

施志海紅溝在縣南十里許係洩水渠自本境楊家陂起至郭家營東南入三道河計長二十五里

洩蓄溝

施志洩蓄溝在縣西南二十五里上自本境孫家莊前陂起至岡周家莊入玉帶河長五里

盤溪溝

施志盤溪溝在縣西南三十五里自本境羅寨西陂起至順羊邨入清流河長八里

文獻志

卷六

二十二

大浪溝

施志大浪溝在縣南四十五里係洩水渠自本境野岡坡起至拐地角入西華界計長四十餘里

白湯溝

施志白湯溝在縣南七十里自本境新色邨南陂起至橫里邨入西華界計長三十餘里

鯉魚溝

施志鯉魚溝自本境倉頭邨西陂起至蔣家莊東入西華界長十餘里

油泮溝

西華縣志油泮溝自鄆陵黃家坡起入扶溝縣境  
楊河溝

續河南通志楊河新溝在鄆陵東北二十里自南至  
北長一百八十步寬一丈深三尺北口寬八尺深五  
尺引坡內之水放入雙泊大河乾隆十七年新開  
温家潭

一統志温家潭在鄆陵縣西北十八里羣岡矗起其  
最巔處津渠浩淼西折爲淵澄清深潔大旱不竭  
施志潭在縣西北十八里居民多温姓因名係洧川  
下流接文河

文獻志

卷六

二十四

岡阜

祈耶山

輿地廣記鄆陵有祁耶山 蒙按祁耶山今無攷

彭祖岡

施志彭岡在縣北二十里彭祖店東袤二里許因彭  
祖名 張琳彭祖岡詩元氣當年萃有商籛鏗遺廟  
儼崇岡神遊天地三千劫顏駐春秋八百長宿草尚  
含莖露白寒林空見鼎烟蒼時人未得延生術只說  
能餐雲母方

楊村岡

施志楊村岡在縣北十里鋪西今被水淤將平  
戴家岡

施志戴家岡在古城北袤二里許

戚家岡

施志戚家岡在阮寨東袤五里

阮寨岡

施志阮寨岡在郜村鋪東南袤五里

郜邨岡

施志郜村岡在縣北南北長二里半屬鄆半屬尉

大勝岡

文獻志

卷六

二十五

蒙按嘉靖二年僧雪崑重修慕寨天峰寺記云岡名  
大勝寺額天峰則大勝岡卽在慕寨左右也

半截岡

施志半截岡在彪岡東袤二里

彪岡

施志彪岡在縣東北十里北枕泊水河南近七里河  
袤二里許 一統志彪岡在鄆陵縣東北以形似名

楊河岡

施志楊河岡在丁家橋南三岡竝峙東兩岡袤三里  
西岡袤五里上有鄭中丞墓

鳳凰岡

施志鳳凰岡在縣北十五里因形如鳳故名南北長五里上有寨

左家岡

施志左家岡在鳳凰岡前世傳爲鳳頭濶五十畝

文家岡

施志文家岡在黨家岡東北迤邐通滕家岡毛家岡田家岡直抵古城西南隅約十五里

党家岡

施志党家岡在縣西北袤二里與文家岡合爲一

文獻志

卷六

二十六

曲岡

施志曲岡在趙寨東南南北長一里

太平岡

施志太平岡在簡岡西方圓三十餘畝

馮岡

施志馮岡在沙灘西北袤一里許

簡岡

施志簡岡在馮岡北袤一里許

三岡

施志三岡在陶城西北長二里三岡竝峙故名

追岡

施志追岡在三岡西

野岡

施志野岡在追岡西廣二里

河岡

施志河岡在曲莊東南廣百餘步

樂陵岡

施志樂陵岡在縣東九里許南北長二里

孝子岡

施志孝子岡在縣東南七里長二里以夏榮名

文獻志

卷六

二十七

龍形岡

施志龍形岡鄆城半枕其上西自王岳村入本境東至葑菜園入扶界上有蔡河故道卽舊志所載長隄洧川志延秀岡在洧川縣南十里逕鄆陵縣治北東逾扶溝上下數百里起伏蜿蜒布精結秀沿岡上下邑鎮村落官民瑩兆不可勝計 陳州府志扶溝縣治長岡西自嵩少之麓由鄆陵蜿蜒而來 蒙按施志有龍形岡又有黃土岡今考黃土岡卽龍形岡施志誤分爲二今正之 劉訥詩驅馬春郊送目寬孤城杳靄衆岡攢紅鋪仄逕堪攜杖翠繞層樓欲倚

欄彭阜出雲嵩少近德星傍月斗牛寒地靈從古鍾  
賢俊更俯雙溝玩碧湍 陳溥詩南山幽意寄西風  
一啟高窗遠色重小酌微醺啼鳥去獨回殘日挂烟  
中 陳棐詩層疊繞孤城遙看蒼翠橫雲連嵩少動  
影抱泊河明綠野便龍臥青霄宜鳳聲皇家同與固  
千載頌昇平